

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 2/1

12 ապրիլի 2016 թ.

Քննարկվեց Ա/Ձ Տիգրան Այվազյանի 01.03.2016թ-ի գանգատը ՀՀ ՖՆ իրավաբանական վարչության պետի 03.02.2016թ-ի թիվ 382/02 որոշման դեմ:

Ա/Ձ Տիգրան Այվազյանի գանգատում բերված փաստարկները.

Ա/Ձ Տիգրան Այվազյանի կողմից ստացվել է ՀՀ ՖՆ իրավաբանական վարչության պետի 03.02.2016թ-ի թիվ 382/02 որոշումը, որի համաձայն 2014թ. տարեկան հաշվարկով սոցիալական վճարի տարեկան պարտավորությունը կազմում է 423.300 դրամ, որից ապառք 300.000 դրամ, տույժ 123.300 դրամ:

Գանձման որոշման մեջ նշված սոցիալական վճարի հետ Ա/Ձ Տիգրան Այվազյանը համաձայն չէ, քանի որ 12.06.2015թ-ին էլեկտրոնային եղանակով ներկայացվել է ճշգրտված հաշվետվություն:

Ելնելով վերոգրյալից՝ Ա/Ձ Տիգրան Այվազյանը խնդրում է անվավեր ճանաչել ՀՀ ՖՆ իրավաբանական վարչության պետի 03.02.2016թ-ի թիվ 382/02 որոշումը:

ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.

ՀՀ ՖՆ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ՖՆ իրավաբանական վարչության պետը, քննարկելով Ա/Ձ Տիգրան Այվազյանի վերաբերյալ վարչական վարույթի նյութերը պարզել է, որ 02.02.2016թ-ի դրությամբ նրա չկատարված հարկային պարտավորությունները կազմում են 459.416 դրամ, որից սոցիալական վճարի գծով պարտավորությունը կազմում է 423.300 դրամ (300.000 դրամ ապառք, 123.300 դրամ տույժ), որն առաջացել է 2014թ-ի տարեկան հաշվարկից: Եկամտային հարկի գծով պարտավորությունը կազմում է 20.946 դրամ, որից ապառք 20.546 դրամ, տույժ 400 դրամ, որն առաջացել է 2015թ-ի դեկտեմբեր ամսվա հաշվարկից: Շրջանառության հարկի գծով պարտավորությունը կազմում է 1.362 դրամ, իսկ սոցիալական վճարի (ամսեկան) գծով պարտավորությունը կազմում է 13.808 դրամ:

Արդյունքում, ղեկավարվելով «Հարկերի մասին» ՀՀ օրենքի 29.1 հոդվածի և «Վարչարարության հիմունքների և վարչական վարույթի մասին» ՀՀ օրենքի 55-րդ, 56-րդ, 58-րդ, 88-րդ հոդվածների դրույթներով ՀՀ ՖՆ իրավաբանական վարչության պետի կողմից 03.02.2016թ-ին ընդունվել է թիվ 382/02 որոշումը (այսուհետ նաև Որոշում) Ա/Ձ Տիգրան Այվազյանից 459.416 դրամ պարտավորության գումար գանձելու մասին:

Ա/Ձ Տիգրան Այվազյանի գանգատը վերաբերվում է Որոշմամբ 2014թ. տարեկան սոցիալական վճարների գծով գանձման առաջադրված պարտավորությանը՝ գումարով 423.300 դրամ (ապառք՝ 300.000 դրամ, տույժ՝ 123.300 դրամ):

Քննարկման ընթացքում պարզվեց, որ Ա/Ձ Տիգրան Այվազյանի կողմից 15.04.2015թ-ին ներկայացվել է 2014թ-ի տարեկան եկամուտների պարզեցված հաշվարկը, որում թյուրիմացաբար արտացոլվել է 300.000 դրամի չափով տարեկան սոցիալական վճարի գումար: Այնուհետև, հայտնաբերելով թույլ տրված անճշտությունը, Ա/Ձ Տիգրան

Այվազյանի կողմից 12.06.2015թ-ին ներկայացվել է ճշտված հաշվարկ, որով տարեկան սոցիալական վճարի գումար չի հաշվարկվել:

Վերոգրյալի կապակցությամբ հարկ է նշել, որ «Կուտակային կենսաթոշակների մասին» ՀՀ օրենքի 7-րդ հոդվածի 7-րդ մասի համաձայն. «Գործատուները և սույն հոդվածի 4-րդ մասի երկրորդ պարբերությունում նշված վարձու աշխատողները նախորդ հաշվետու ժամանակահատվածների համար ներկայացված սոցիալական վճարի հաշվարկներում սխալների ինքնուրույն հայտնաբերման դեպքում կարող են բացառապես էլեկտրոնային եղանակով հարկային մարմին ներկայացնել ճշտված հաշվարկներ, որոնց հիման վրա կատարվում է այդ ժամանակահատվածների համար սոցիալական վճարների պարտավորությունների վերահաշվարկ, բացառությամբ հաշվարկված տույժերի»:

Նույն հոդվածի 8-րդ մասի համաձայն. «Նոտարները, անհատ ձեռնարկատերերը և ինքնագրադրվածները հաշվետու ժամանակահատվածի համար տարեկան սոցիալական վճարի մասին հաշվարկը ներկայացնելուց հետո իրավունք ունեն ճշգրտումներ մտցնելու դրանցում արտացոլված տվյալներում»:

Տվյալ դեպքում «Կուտակային կենսաթոշակների մասին» ՀՀ օրենքի 7-րդ հոդվածի 8-րդ մասով հստակ սահմանված է, որ անհատ ձեռնարկատերերը հաշվետու ժամանակահատվածի համար տարեկան սոցիալական վճարի մասին հաշվարկը ներկայացնելուց հետո իրավունք ունեն ճշգրտումներ մտցնելու դրանցում արտացոլված տվյալներում:

Այսինքն, եթե նշված օրենքի 7-րդ հոդվածի 7-րդ մասի համաձայն գործատուների և վարձու աշխատողները նախորդ հաշվետու ժամանակահատվածների համար ներկայացված սոցիալական վճարի հաշվարկներում սխալների ինքնուրույն հայտնաբերման դեպքում ճշտված հաշվարկներ ներկայացվելու դեպքում կատարվում է պարտավորությունների վերահաշվարկ՝ բացառությամբ հաշվարկված տույժերի, ապա նույն հոդվածի 8-րդ մասով նոտարների, անհատ ձեռնարկատերերի և ինքնագրադրվածների համար նման պայմաններում նախատեսված է այլ կարգ, այն է՝ հաշվետու ժամանակահատվածի համար տարեկան սոցիալական վճարի մասին հաշվարկը ներկայացնելուց հետո նրանց իրավունք է վերապահված ճշգրտումներ մտցնելու դրանցում արտացոլված տվյալներում:

Ելնելով վերոգրյալից՝ Հանձնաժողովը գտնում է, որ ՀՀ ՖՆ իրավաբանական վարչության պետի 03.02.2016թ-ի թիվ 382/02 որոշմամբ սոցիալական վճարի գծով գանձման առաջադրված պարտավորությունը՝ գումարով 423.300 դրամ, իրավաչափ չէ և ենթակա է նվազեցման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

ո Ր Ո Շ Ո Ւ Մ Է՝

ՀՀ ՖՆ իրավաբանական վարչության պետի 03.02.2016թ-ի թիվ 382/02 որոշումից նվազեցնել սոցիալական վճարի գծով գանձման առաջադրված պարտավորությունը՝ գումարով 423.300 դրամ:

Հանձնաժողովի նախագահ՝


Վ.ՄԻՐՈՒՄՅԱՆ

